

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni aallartitanut Siulittaasup aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagassaanut nr. 1/2019-imut siunnersuut:

Nunat avannarliit killiit akornanni inuusuttut piffissami aalajangersimasumik killilikkami aalajangersimasumik akikitsumik akeqartillugu angalasinnaannngortillugit aaqqissuussinermik ”interrail’itut” ittumik pilersitsisinnaanermik – imaluunniit allatut assersuutigalugu angalanermut tapiissutinik legatinik pilersitsinikkut nunat avannarliit killiit inuusuttunut ammaannissaannut periarfissanik misissueqqullugit Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni aamma Islandimi Naalakkersuisut kaammattorpai.

(Aallartitat siulittaasuat Vivian Motzfeldt)

Tungavilersuut:

Naak nunat avannarliit killiit naalagaaffeqatigiinniissimagaluartut, sulilu Savalimmiut Kalaallit Nunaallu naalagaaffeqatigiinniikkaluartut, nunani avannarlerni killerni inuusuttut nunat affarlerisat kulturinik misigisassarsiornissamut periarfissaqarsimasut ikitsuararsuupput.

Akunnermi nunanik, kulturinik innuttaasunillu qanimut misigisassarsiortarneq inuiaqatigiit akornanni attaveqatigiinnermik, suleqatigiinnermik susassareqatigiinnermillu nukittorsaataasarpog. Nunat Avannarliit Killiit Siunnersuisoqatigiiffianni ataatsimoorullugit soqutigisat pillugit suleqatigiinnissaq siunertaammat siunissami Nunani Avannarlerni Killerni inuusuttut imminnut ilisarimanerulernissamut periarfissinnerisigut suleqatigiinnerup nukittorsarneqarnissaa qulakkeerneqarnissaalu pinngitsoorneqarsinnaanngitsumik pingaaruteqarpoq. Aaqqissuussinerup Interrail’itut ittup imaluunniit angalanernut tapiissutinik legatinik pilersitsinerup inuusuttut nunat avannarliit killiit akornanni aalaakkaasumik akikitsumik angalasinnaanermut periarfississavai. Aaqqissuussineq Interrail’itut ittoq anguniagassaqqippoq, tassami taamak iliornikkut nunat taakku pingasut akornanni angalaffissani isorartoqisuni akikitsumik angalanissamut inuusuttut periarfissinneqassammata. Aaqqissuussinerup Interrailimut assingusup assersuutigalugu “InterAir Pas’ip” nunani

avannarlerni killerni inuusuttunut atuuttup, nunani avannarlerni killerni suleqatigiinnermut iluaqutaasumik inuusuttut ilisimasassarsiorsinnaanerannik, ilisimasaqalersinnaanerannik, inuunermi sinneranut suleqatissarsiorsinnaanerannik ikinngutitaartorsinnaanerannillu periarfississavai.

Aaqqissuussineq Interrailitut ittoq timmisartuutileqatigiinnut aningaasaqarnikkut annaasaqaataassagaluarpat nunani avannarlerni killerni Naalakkersuisut nunani avannarlerni killerni timmisartuutileqatigiinnut annaasaqaatinik matussusiinissaq pillugu suleqatigiinnermik aallartitseqqullugit Nunat Avannarliit Killiit Siunnersuisoqatigiiffiannit kaammattorneqarput. Rejselegat'it atorlugit angalanermut tapiissuteqartarnermik aaqqissuussinermik inuusuttut nunani avannarlerni killerni najugaqartut qinnuteqarfigisinnaasaannik nunani avannarlerni Naalakkersuisut pilersitsisinnaanerat allatut iliornerusinnaavoq.

North Atlantic Tourism Association, nunat avannarliit killiit pingasuusut ilaanni marlunni atuuttuusoq aqutigalugu timersoqatigiiffimmi, ilinniarfimmi eqimattakkaanut ilaasortaagaanni imaluunniit kulturimut tunngassutillit allat pillugit angalanissamut tapiissutinik qinnuteqarsinnaaneq nunani avannarlerni killerni inuusuttunut ullumikkut periarfissaavoq. Taamaattorliuna eqimattakkaanut peqatigiiffimmulluunniit ilaasortaangikkaanni nunat avannarliit killiit akornanni akikitsumik angalanieq inuusuttunut ajornartoq.

Taamaammat inuusuttut nunat avannarliit killiit akornanni aalajangersimasumik appassisumik akiliillutik angalasinnaangornissaannut periarfissanik misissueqqullugit, Naalakkersuisut pingasut Nunat Avannarliit Killiit Siunnersuisoqatigiiffiannit kaammattorneqarput.